

EDITORIAL

Sa bantayog sa mga bayani ug martir, panumpa nga iasdang ug pakusgon ang rebolusyon

Ginahinumdom ug ginahataga'g pasidungog nato karong semana ang tanang bayani ug martir sa nilabayng kapin lima ka dekada sa walay hunong nga pagpaasdang sa rebolusyong Pilipino. Ang Semana sa paghinumdom ug Pagparangal sa Mga Bayani ug Martir sa Katawhang Pilipino (Abril 17-24) gideklara sa Nasudnong Konseho sa National Democratic Front of the Philippines (NDFP) isip tinuig nga paghinumdom.


Sa umalabot nga Abril 24, sa ika-50 nga anibersaryo sa NDFP, hatagan nato og pinakataas nga pagpasidungog silang Kaubang Benito Tiamzon ug Wilma Austria, mga nanguna ug maayong lider sa Partido, nga gidakop uban ang walo pa, gitortyur ug gipatay sa mga sundalo niadtong Agosto 21, 2022. Sa pagsidlak sa kahayag sa maong adlaw, ipahigayon sa tanang yunit sa BHB ang hilom nga 21-gun salute isip pagparangal sa ila ug sa tanang bayani sa nasud. Ipahigayon usab sa lain-laing rebolusyonaryong or-

ganisasyong masa ang lain-laing klase sa tigom ug asembleya, tago ug dayag, kung asa mahimong basahon ang mga parangal ug paghinumdom sa atong mga bayani.

Ihatag usab nato ang pinakataas nga pag-ila sa pangulong tigtukod sa PKP nga si Ka Jose Maria Sison (Amado Guerrero) nga gihalad ang halos unom ka dekada sa iyang kinabuhi sa patriyotiko ug demokratikong tinguha sa katawhang Pilipino. Hangtud sa hangtud nga magpabilin ang iyang rebolusyonaryong diwa ug kanunay'ng magsilbing

inspirasyon sa mosunod nga henerasyon sa mga rebolusyonaryong Pilipino.

Niini nga adlaw, hinumdumon usab nato ug parangalan ang uban pang mga kagawad sa Komite Sentral sa Partido. Walay-kamatayon ang kabilin nilang Jorge Madlos (Ka Oris), Julius Giron (Ka Nars), Menardo Villanueva (Ka Bok), Antonio Cabanatan (Ka Manlimbasog) ug ubang mga rebolusyonaryo ug komunista nga naggahin sa ilang ti buok kinabuhi sa pakigbisog sa katawhang Pilipino alang sa tinuod nga kagawasan ug demokrasya. Hinumdumon usab nato ang tanang kadre sa Partido, mga Pulang manggugubat sa BHB, mga rebolusyonaryo, aktibista ug ordinaryong tawo nga gisakripisyo ang tanan alang sa interes sa katawhan. Si-



lang tanan angayang makadawat og medalya ug pag-ila.

Dili matarog nga mga bantayog sa nasudnon-demokratikong rebolusyon ang mga martir sa katawhang Pilipino. Gipakita nila ang dili mabangbang nga kabubut-on nga makigbisog kauban sa masang Pilipino batok sa imperyalismo, pyudalismo ug burukrata kapitalismo. Ginahatag nato sa ila ang pinakataas nga pagtahod ug pagsaludo!

Saluduhan usab nato ang tanang masang rebolusyonaryo, mga aktibista sa mga organisasyong masa, mga Pulang manggugubat, organisador ug kadre sa Partido nga padayon nga nanglimbasog sa rebolusyonaryong dalan taliwala sa mga kalisdanan ug sakripisyo ilabina atubangan sa nagkagrabeng kampanya sa pasistang terorismo nga ginatukmod sa imperyalismong US. Atubangan sa kadulom sa pasismo, sila ang nagahatag og kahayag ug giya alang sa pakigbisog sa katawhan.

Labaw pa sa paghinumdom ug paghatag-parangal sa atong mga martir ug bayani, ideklara nato sa ilang bantayog ang atong tibuok-kasing-kasing nga kabubut-on nga padayon nga latason ang dalan nga ilang gibaktas ug abagahon ang bug-at nga tahas nga ilang gibilin

alang sa labaw pang pagpaasdang sa rebolusyonaryong pakigbisog aron tapuson ang tanang porma sa pagpangdaug-daog ug pagpahimulos sa katawhan.

Labaw pang nagkagrabe ang pag-antos sa katawhang Pilipino ilalom sa pasistang rehimeng US-Marcos. Ginapatuman niini ang palisiya ug programang lunod-patay nga kontra-katawhan ug pabor sa langyawng mga kapitalista. Aron danihon ang mga langyawng kapitalista, ginalansang ang suhol sa mga mamumuo ug ordinaryong empleyado bisan kulang kaayo kini aron gahinan ang panginahanglan sa ilang mga anak. Wala'g tuo nga ginakawat ang yuta, kabukiran, mga sapa ug kadagatan ug ginapihig sa katawhan ang tinubdan sa ilang panginabuhian.

Garapalan ang pagpakaitoy ni Marcos sa iyang among imperyalistang US sa pagtugot sa plano niining magtukod og upat o kapin pa nga dugang base militar, ilabina sa amihanang Luzon, subay sa ginahimong pagpanghagit sa US og gubat pinaagi sa pagsulsol sa pagbulag sa Taiwan sa China. Ginapasagdan ni Marcos ang US nga gamiton ug i-apil-apil ang Pilipinas sa usa ka gyeongrang siguradong mobungkag sa kagawasan ug kinabuhi sa mga Pilipino.

no.




Ang sakripisyo sa atong mga bayani nagbunga sa porma sa rebolusyonaryong gahum nga nakab-ot ug natukod sa tibuok nasud. Ang maong gahum nagagikan sa katawhan. Lalom ug lapad kining nakaugat ug padayon pang nagalapad. Dili kanus-aman kini mabuntog bisan atubangan sa walay-hunong nga mga kampanyang militar sa pagpanumpo sa kaaway. Ang maong gahum ang kaugmaon sa katawhang Pilipino.

Ginapakita sa kontra-katawhan ug kontra-demokratikong paghari sa rehimeng Marcos, ug ang nagkagrabeng krisis sa nagaharing sistemang semikolonyal ug semipyudal ang nagapadayon nga panginahanglan nga iasding ang rebolusyonaryong pakigbisog alang sa nasudnong demokrasya. Layo na ang giasding sa niagi. Bisn layo pa ug lisod ang dalan nga pagatumban, kinahanglan kining baktason aron adunay kahigayunang makasinati og bag-ong kinabuhi ang mga Pilipino.

Nagapanawagan ang Partido sa katawhang Pilipino nga ipadayon ang maisugon nga pakigbisog batok sa paghari sa kabangis sa kaaway, ug mosukol aron kab-uton ang hustisya alang sa tanang biktima sa pasistang terorismo.

Kinahanglang padayon nga pakusgon ang organisadong han-ay sa katawhan ug iasding ang militanteng mga pakigbisog aron iasding ang mga makinasudnon ug demokratikong tinguha sa katawhan. Hiusahon ang katawhang Pilipino aron ihimulag ug batukan ang rehimeng US-Marcos.

Determinado ang tibuok Partido, gikan sa Komite Sentral hangtud sa mga sanga niini, lakip na ang mga yunit sa Bagong Hukbong Bayan, ug tanang rebolusyonaryong organisasyong masa, nga magpakusog ug pahugton ang paglambigitay sa lapad nga masa sa katawhan aron panguluhan ang ilang mga pagsukol, ug magpakamaayo sa dalan sa rebolusyonaryong pakigbisog.

 <p>Bolyum LIV Ihap 8 Abril 21, 2023</p> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray, Ingles ug Espanyol. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editorial: Sa bantayog sa mga bayani ug martir, panumpa nga iasding ug pakusgon ang rebolusyon 1</p> <p>Parangal para nilang Ka Benito ug Ka Wilma 3</p> <p>Pagbansag nga terorista, gikundena 3</p> <p>Pagpangandam sa kabatan-onan sa rebolusyon 4</p> <p>Mga opensiba sa BHB sa 4 ka prubinsya 5</p> <p>“Modernisasyon” sa AFP nga nakapunting sa imperyalistang pagpanulsol og gyera 6</p> <p>Pakigbisog alang sa yuta sa Tarlac ug Negros 7</p> <p>EDCA ug "modernisasyon" sa AFP 7</p> <p>War games sa US, perwisyo sa mga Pilipino 8</p> <p>Mga protesta 8</p> <p>Sa mubong pagkasulti 9</p> <p>Nagkadakong ihap sa trabahong impormal 10</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
 ang.bayan@cpp.ph	 @angbayan1969

Pinakataas nga parangal para nilang Kaubang Benito Tiamzon ug Wilma Austria

I sip pinakataas nga pagsaludo sa mga lider sa Partido nga silang Benito Tiamzon ug Wilma Austria-Tiamzon, ginamando sa Nasudnong Kumand sa Operasyon sa Bagong Hukbong Bayan ug Komite Sentral nga magpormasyon ug hilom nga ipahigayon ang 21-gun salute sa pagsidlak sa adlaw sa Abril 24, sa okasyon sa ika-50 nga anibersaryo sa National Democratic Front of the Philippines.

Basahon ug hisgutan sa tanang pagahimuong mga tigom-parangal ang pahayag sa Kawanihan sa Pulitika sa Komite Sentral nga naghatag pasidungog nilang Kaubang Benito Tiamzon ug Wilma Austria-Tiamzon (Kaubang Laan ug Kaubang Bagong-tao) nga gipagawas isip ispesyal nga isyu sa Ang Bayan niadtong Abril 20.

Gianunsyo sa Kawanihan sa Pu-

litika sa Partido Komunista ng Pilipinas niadtong Abril 20 ang brutal nga pagpatay sa Armed Forces of the Philippines, sa suporta sa militar sa US, ilang Kaubang Benito ug Wilma Tiamzon. Sa taas nga panahon, si Ka Benito nagsilbing nangulo sa Komiteng Tigpatuman sa Komite Sentral, samtang si Ka Wilma ang kinatibuk-ang kalihim sa Partido.

Ang magtiayon, kauban ang wa-

lo pa, bangis ug grabe ka ngilngig nga gipatay sa mga mersenaryong tropa ilalom sa Joint Task Force Storm ug Task Force Trident niadtong Agosto 21, 2022. Nadakpan sila sa Samar samtang nagabyahe sakay sa duha ka *van* tali sa alas-12 sa udto ug ala-1 sa hapon.

Bangis sila nga gipaantos ayha gipatay. Sa nisunod nga adlaw, gisakay ang mga walay kinabuhi nilang mga lawas sa usa ka motorboat ug gipaguyod sa tunga-tunga sa dagat tali sa Catbalogan City ug Tarangnan Island. Didto gipabusikad ang bangka aron ipagawas nga adunay engkwentro sa dagat ug tabunan ang ngilngig nga krimen. **AB**

Pagbansag nga terorista sa konsultant sa NDF, gikundena

Gikundena sa National Democratic Front of the Philippines ang pagtawag og terorista sa usa sa mga konsultant niini sa hisgutang pangkalinaw. Human kini sa pagparada sa mga pulis kang Eric Casilao atubangan sa midya ug publiko aron pakaulawan ug tamayon. Nadakop si Casilao samtang nagbyahe gikan sa Malaysia padulong sa Thailand niadtong Abril 1. Gideport siya sa Pilipinas niadtong Abril 17.

Dili angayang tawagon nga "terorista" si Casilao, matud ni Juliet de Lima, interim nga lider sa negotiating panel sa NDFP. Katungod niya nga ilhon nga inosente hangtud wala pa napamatud-an nga sad-an sa tanang alegasyon batok kaniya. Katungod niya nga makaangkon og abogado ug dunggon ang iyang mga kaso sa mga korte. Kabahin si Casilao sa Reciprocal Working Committee on the Comprehensive Agreement on Socio Economic Reforms para sa Southern Mindanao.

Samtang, nagapadayon ang pasistang pagpanumpo sa kabukiran.

Sa Negros Occidental, gipusil sa 62nd IB ang mag-uuma nga si Jose Albores Jr. sa Sityo Upper Tiyos, Barangay Quinten Remo, Moises Padilla, Negros Occidental niadtong Abril 18. Nagsilbi siya nga testigo sa pagpamig-ot sa militar sa iyang silingan busa siya ug gipatay.

Sa Misamis Oriental, brutal nga gipatay sa 58th IB ang mag-uuma nga si Ricardo Hilogon sa Sityo Tapol, Barangay Banglay, Lagonglong niadtong Abril 3. Si Hilogon kanhing myembro sa BHB ug dugay na nga niundang sa paglihok.

Pag-aresto ug pagpamig-ot. Iligal nga giaresto sa 62nd IB ang magtiayon nga silang Jerry Montefalcon, 49, ug Maricel Alper sa ilang balay sa Sityo Natuling, Barangay Budlasan, Canlaon City, Negros Oriental niadtong Abril 15.

Sa Palawan, unom ka residente sa Brooke's Point nga nagsalmot sa barikadang bayan batok sa pagmina sa Ipilan Mining Corporation ang iligal nga giaresto sa mga pulis niadtong Abril 14.

Iligal nga gisulod ang pinuy-anan sa mag-uuma nga si Aileen G. Estiller sa mga pwersa sa estado niadtong

Abril 6 sa Sityo Kaloko, Barangay Sta. Barbara, Bulusan. Gikawat ang iyang mga binuhing mananap ug kahimanan.

Atake sa komunidad. Dili moubos sa unom ka komunidad sa mga lungsod sa Isabela ug Binalbagan, Negros Occidental ang giokupa sa mga pwersa sa 94th IB ug 62nd IB sukad Abril 10 hangtud sa kasamtangan. Tungod sa pagdumog sa mga sundalo ug perwisyo sa mga tsekpoynt, napugos ang mga upisyal sa Barangay Payao, Binalbagan, nga isuspinde ang klase niadtong Abril 12. Giistraping usab sa mga sundalo ang balay sa pamilyang But-ay sa Sityo Pallacon sa maong barangay niadtong Abril 11.

Nahitabo ang susamang pagsamok sa militar sa Moises Padilla ug Himamaylan City sa Negros Occidental ug Guihulngan City sa Negros Oriental hangtud sa kasamtangan.

Sa Agusan del Sur, gipaulanan og bala sa mga pang-atakeng helikopter sa AFP ang Sityo San Miguel, Barangay Pinagalaan, Bayugan City niadtong Abril 16. Gipagawas sa mga sundalo nga adunay nahitabong engkwentro tali kanila ug sa BHB. **AB**

Sangandaan: Pagpangandam sa kabatan-onan sa tibuok-panahong pagrebolusyon

Nagadagayday sa dugo sa mga kabatan-onang taga-syudad ang diwang rebolusyonaryo ni Andres Bonifacio. Dili layo sa Tondo, kung asa gipanganak si Bonifacio, nakaplastar ang opisina sa mga rebolusyonaryong kabatan-onang ginakinabuhi ang mga panultihong, "Kinabuhi man ang ihalad."

Matag adlaw, tibuok-panahong nagapukaw, naga-organisa ug naga-palihok ang mga membro sa Kabataang Makabayan sulod sa mga eskwelahan aron agnihon ang sama nilang kabatan-onan nga moadto sa mga pabrika, kabus nga komunidad ug mga umahan aron makita ang tinuod nga kahimtang sa katawhan. Ginaagni nila nga mosalmot ang mga kabatan-onan sa rebolusyonaryong pakigbisog, mosuporta sa armadong pakigbisog ug mosampa sa Bagong Hukbong Bayan.

Dili sayon ang magdesisyon nga magpultaym tungod kay kaluha niini ang dagkong sakripisyo gikan sa naandang kinabuhi ug paggahin og tibuok panahon sa lisod nga dalan sa pakigbisog.

Dako ang papel nga ginapapelan sa mga tsapter sa KM aron bansayon ang nagkadaghang tibuok-panahong rebolusyonaryo. Sa nilabay nga panahon, nakit-an gikan sa kasinatian ang bili sa tanang-bahin nga konsolidasyon aron matabangan nga tibukon sa usa ka membro ang iyang de-

sisyon nga magpultaym sa syudad man o sa kabanikanhan. Kabahin niini ang sustenidong programa sa edukasyon, buhi nga programa sa pakig-sandurot sa batakang masa, pagtukod og mas hugot nga lambigitay sa mga natarang gerilya, ug pagpahigayon og mga pagbansay aron iandam ang kabatan-onan sa lisod nga dalan sa armadong pakigbisog.

Taliwala sa paghunong sa pag-eskwela sa mga unibersidad niadtong pandemya, wala nahunong ang pagtuon sa kabatan-onang pultaym mahitungod sa katilingban. Yawe ang pagpahuman sa mga nag-una ug espesyal nga mga kursong masa mahitungod sa katilingban ug rebolusyong Pilipino, mga sinulat ni Jose Maria Sison, ug mga diskusyon sa Marxisimo, Leninismo ug Maoismo aron tukuron ug palig-unon ang rebolusyonaryong paghukom sa mga myembro. Ginagamit ang mga tago nga sirkulo sa pagtuon aron tigumon ang mga membro sa KM sulod sa mga unibersidad ug ipahigayon ang mga kolektibong diskusyon sa mga pagtulunan.

Ang mga teoryang natun-an gikan sa mga diskusyon ang nahimong armas sa usa ka myembro ug tibuok kolektibo aron mas maayo nga masabtan ang mga kontradiksyon sa katilingban ug bisan sa mga indibidwal.

Gawas sa teoretikal nga mga diskusyon, mahinungdanong unod sa programa sa mga tsapter sa KM ang paglatid niini

sa praktika pinaagi sa pagsalmot sa pakigbisog sa katawhan. Hugot nga ginahimong kaabag sa Partido ang mga tsapter sa KM aron padaghanon ang ihap sa masang kabatan-onan nga moadto ug makig-uban sa batakang masa. Sa regular nga pag-adto sa mga kabatan-onan sa mga komunidad, makita nila ang ilang papel sa katilingban--ang pagka-propagandista ug organisador sa han-ay sa batakang masa.

Magamit sa mga kabatan-onan, partikular na ang mga estudyante, ang kahanas isip intelektwal aron mapalawig sa ordinaryong mga tawo ang gisinati nilang pagpahimulos, ug ang dalan sa nasudnon-demokratikong pakigbisog.

Ginapamaayo sa mga balangay sa KM kung paunsa subling makabag sa pagpakusog sa kalihukang pamuo ug sa pagtukod og mga pulang brigada sa mamumuo sulod sa mga pabrika ug mga kasikbit nga komunidad. Sa niagi, daghang kabatan-onan ang nagdesisyong magpultaym human direktang masandurot ang masang-anakpawis. Matud sa usa ka pultaym nga myembro, "Lahi kung nakasandurot ka sa masa ug nasinati nimo ang pait nilang reyalidad."

Usa usab sa kusog nga ginkampanya sa mga tsapter sa KM ang pag-adto sa kabukiran ug pag-sampa sa BHB. Gimugna niini ang mga programa nga labaw pang nagpaduol sa mga myembro sa KM ug Partido sa han-ay sa kabatan-onan sa mga natarang gerilya sa kabanikanhan. Gibunga niini ang materyal nga suporta sa hukbo, pagpadala og mga pwersa sa mga nataran ug pagtinabangay sa mga pangpultikang kampanya sa mga probinsya ug rehiyon. Kalambigit usab niini ang pagmugna og programa aron pisikal nga iandam ang kabatan-onan sa kinabuhi nga lisod sa kabukiran. Ginaduso ang pag-ehersisyo,

Sundan sa panid 5



Mga armadong aksyon, gilunsad sa BHB sa 4 ka prubinsya

Gilunsad sa mga yunit sa Bagong Hukbong Bayan (BHB) sa upat ka prubinsya ang managsunod nga taktikal nga opensiba isip kabahin sa pagpaningkamot nga pakyason ang mga operasyong militar sa teroristang rehimeng US-Marcos.

Sa Masbate, nakumpiska sa mga Pulang manggugubat ang usa ka ripleng armalayt gikan sa mga aset sa militar sa Sityo Pondol sa utlanan sa mga barangay sa San Carlos ug Matagbac sa Milagros niadtong Abril 14. Ang mga aset ang nagpasiugda og agresibong pagpangatake sa mga lumulupyo sa ikaduhang distrito sa prubinsya. Napatay ang usa sa mga aset samtang nasamdan ang laing duha pa.

Subay sa taho sa mga Pulang

manggugubat, samtang ginakumpiska ang armas sa mga aset, nangagsukol sila ug gigamit pa nga taming ang mga kauban nilang sibilyan. Tungod niini, paspas nga nilihok ang mga manggugubat aron tabangan ang mga sibilyan, ilabina ang usa ka bata aron masalba sila gikan sa peligrosong sitwasyon.

Sa Negros Oriental, nakumpiska sa BHB ang tulo ka ubos nga klase sa armas kang Jorge Javier, aset paniktik sa 62nd IB, sa usa ka operasyong partisano niadtong

Abril 16 sa Sityo Guibawan, Barangay Bucalan, Canlaon City, Negros Oriental. Napatay usab sa maong operasyon si Javier.

Sa Camarines Sur, usa ka sundalo ang napatay sa gipahigayon nga operasyong isnayp sa BHB batok sa detatsment sa 81st IB nga nahimutang sa Barangay Tible, Lupi, Camarines Sur. Gipahigayon ang operasyon sa gilay-ong 200 metros niadtong Marso 30 sa takna sa alas-dyes trenta sa buntag.

Sa Camarines Norte, gipabuthan sa BHB ang detatsment sa 9th IB sa Sityo Cupido, Barangay Malaya, Labo niadtong Abril 1. Usa ka sundalo ang napatay sa maong operasyon. AB

Gikan sa panid 4

pagkaon og sakto, ug pagpahigayon og mga espesyal nga bansay-militar sa han-ay sa mga myembro. Dili susama sa pinugos nga ROTC sa estado, ang pagbansay ilalom sa hukbo labaw pang mas mahinungdanon ug maka-engganyo tungod kay kini prinsipyado ug nagaalagad sa interes sa masa. Hugot kining ginagakos ug ginasalmutan sa kabatan-onan.

Nagaagi sa daghang kontradiksyon ang kabatan-onan sa proseso sa pagtukod og matngon nga desisyong magpultaym. Anaa ang kontradiksyon sa kaugalingon, sa pagtuon, sa pinansya, ug labaw sa tanan, sa pamilya. Daghan ang nabalaka nga magpultaym tungod sa konsiderasyon sa pamilya. Dili malimod nga daghang ginikanan, ilabina sa sinugdanan, ang dili makatugot sa desisyon sa ilang mga anak nga mahimong aktibista o rebolusyonaryo. Ginasakmit kini sa estado sa pagpahigayon og anti-komunistang propaganda nga nagatarget sa ila. Apan ginatugbangan kini sa walay-kakapoy nga pagpasabot, kung asa mas kasagaran kay sa dili, makuha sa kabatan-onan ang suporta sa ilang ginikanan sa desisyon nilang baktason ang da-

lan sa rebolusyon.

Ang uban usab nga kabatan-onan, sa sayong edad, gipas-an na ang responsibilidad nga magtrabaho alang sa ilang mga pamilya. Ang uban nagapaningkamot makahuman og pag-eskwela aron makakuha og mas maayong trabaho, samtang ang uban dili na makayang maghulat, ug ginapili na nga biyaan ang pag-eskwela alang sa gamay kaayo nga suhol.

Apan unsaman kalisod, ginapili pa gihapon nila nga suungon ang maong mga kontradiksyon tungod kay tin-aw sa ila nga ang bugtong paglaom nga makapabag-o sa katingban anaa sa pagpadaog sa de-

mokratikong rebolusyon sa katawhan. Sa paghupot sa mapadayunong konsolidasyon ug ang makuting pagatubang sa kolektibo sa mga kontradiksyon sa usa ka myembro, dili mahimong imposible sa iya nga magdesisyong magpultaym. Ginadapat ang mga teoryang natun-an, sama sa diyalektikong materyalismo aron tuki-on ang matag kontradiksyon ug makakab-ot og mga resolusyon. Kini usab ang yawe aron pandayon sa matag myembro ang kaugalingon ug talikdan ang indibidwalismo nga kinaiya sa kabatan-onang petiburges nga nagababag sa mapadayunong pag-alagad nila sa masa. Ginapalig-on sa teorya ug praktika ang katarungang magremolda aron masalikway ang maong mga tendensiya, ug moasdang sa matag gimbuhaton.

Sa padayon nga pag-asdang sa rebolusyonaryong kalihukan, sigurado nga mas daghan pang kabatan-onan ang magtampo sa ilang kahibalo, talento ug kusog alang sa katawhan. Ang inspirasyong gikutlo nila kang Bonifacio ug tanang bayani sa katawhang Pilipino magapalig-on sa ilang kabubut-on nga walay-pagduha-duha nga igahin ang tibuok kinabuhi alang sa pag-asdang sa rebolusyon. AB



“Modernisasyon” sa AFP nga nakapunting sa imperyalistang pagpanulsol og gyera

Nagsalig sa langyaw ug walay kaugalingong baruganan ang Armed Forces of the Philippines (AFP). Sa panahon sa gubat, wala kiniiy katakus nga panalipdan ang kagawasan ug panginabuhian sa katawhang Pilipino. Hugot nga nahikot ang kasamtangang oryentasyon, operasyon ug bisan mga armas niini sa estratehiya ug interes sa US sa Asia.

Sukad sa sinugdanan, ginaarman sa US ang AFP og daan na ug gipang-ayo nga kahimanan nga gidispatsa sa sundalong Amerikano. Ginapaagi kini sa mga programa nga agianan sa armas ug pondo sama sa Excess Defense Article (EDA) ug Foreign Military Financing (FMF). Nagadaloy usab ang pondo ug armas pinaagi sa Overseas Contingency Operations (kanhing "war against terror") nga nagamantine sa permanenteng base sa Mindanao (kanhi ang Joint Special Operations Task Force-Philippines ug gikan 2017, ang Operation Pacific Eagle-Philippines).

Sa niaging dekada, gipakusog sa US ang pag-armas sa AFP subay sa "pivot" o pagliyuk niini sa Asya. Subay sa usa ka gipublikong balita sa ahensya sa depensa sa US niadtong 2020, mokabat sa \$11 milyon (550 milyon) ang bili sa daan nga armas, himan, ug uban pa ang gibubo niini sa Pilipinas tali sa 2011-2019. Kabahin kini sa halos \$442 milyong (P22.1 bilyon) bili sa mga "article" o himan nga giawtorisa sa ahensya sa

depensa sa US nga itambak sa Pilipinas sa susamang panahon.

Kalakip niini ang duha ka C-130, mga trak ug uban pang sakyanang pangmilitar, masinggan, gagmay nga sakyanan pangdagat, sanina, tangke, himan pangdental/medikal, water purifier ug klase-klaseng kahimanan. Niini usab nga panahon gidispatsa sa US ang dili na mapuslan nga barkong panggubat aron ipalawig sa Pilipinas sa South China Sea.

Nahitabo ang pagbubo sa mga armas luyo sa pagpakaron-ingnon sa kanhing presidente nga si Rodrigo Duterte nga "makigbulag" sa US. Niadtong 2019-2021, giawtorisa sa US ang pagtumod sa himan-militar sa Pilipinas nga nagkantidad sa halos \$171.3 milyon (P8.565 bilyon). Kaniadtong 2019 lamang, sa wala pa "gisuspinde" ni Duterte ang Visiting Forces Agreement, naggahin ang US og mga himan-militar nga nagkantidad og \$24 milyon (P1.2 bilyon) ubos sa EDA. Lakip niini ang mga mugbo ug tag-as nga armas, sakyanan, misayl, rocket, torpedo, bomba ug bomba (*mines*), makina ug klase-

klaseng kahimanan.

Gipanghinambog sa embahada sa US sa Pilipinas nga nakahatag ang US og \$1.14 bilyon (P57 bilyon) nga ayudang militar sa Pilipinas gikan 2015 hangtud 2022. Halos 41% (P23.9 bilyon) niini anaa sa dagway sa FMF. Lakip sa dagkong himan nga gibaligya sa US sa AFP ang duha ka eroplanong paniktik nga Cessna, mga drone nga ScanEagle, armas pang-isnayp ug kontra-bomba ug mga pusil, bala ug bomba. Gigamit kini sa gubat kontra-insurhensya sa AFP batok sa katawhan sa kabukiran.

Kaniadtong 2018, nibwelo ang "modernisasyon" sa AFP human gigahinan og reaksyunaryong estado og \$5.6 bilyon (P300 bilyon) alang sa sunod nga lima ka tuig. Gigamit sa mga heneral sa AFP ang pondo aron dugang pang mopalit sa mga gamang-US nga armas ug himan. Gilarga usab nila ang pagpalit sa kunuhay "mas barato" nga himan militar gikan sa mga subsidiyaryo o kasosyo sa US nga mga kumpanyang militar sa South Korea (eroplanong FA-50), Israel (Hermes UAV, Atmos 2000) Poland (helikopter na Blackhawk) ug uban pa. Kini nga mga dagkong aytem adunay kalambigit nga mga kontrata sa pag-ayo ug pyesa nga sama kadako o mas dako ang kantidad sa kontrata sa pagpalit. Gihimong dugang gatasan sa mga heneral kini nga mga kontrata.

Sa katapusan, tanan nga gipalit ug gidawat nga armas sa Pilipinas tanan adunay pagtugot sa US. Gipadaplin sa AFP ang "gihatag" sa China nga pipila ka pusil tungod kay "hinay" kuno kini nga klase. Niatras ang mga upisyal sa depensa nga mopalit og mga helikopter sa Russia sa pangatarungan nga dili kini "haom" sa kasamtangang sistema ug operasyon sa AFP. Sa aktwal, walay lihok ang AFP nga wala ginakompas o ginahatagang direksyon sa US. **AB**



Pakigbisog alang sa yuta sa Tarlac ug Negros

Gatusan ka residente sa Negros ug Tarlac ang nakigbisog alang sa ilang mga katungod sa yuta ug kaayuhan. Sa Tarlac, nagprotesta atubangan sa munisipyo sa Capas ang mga myembro sa Nagkakaisang Mamamayan ng Santa Lucia para sa Lupa, Kabuhayan, at Paninirahan niadtong Abril 13. Gikontra nila ang pagpangawat og yuta nga ginapahigayon sa Armed Forces of the Philippines ug pagguba sa ilang mga umahan.

Ginagamit sa AFP ang Bases Conversion Law aron ilugon ang produktibong mga umahan ug himuon kining kabahin sa *firing range* sa Camp O'Donell. Sa una, hangtud 10 ektarya lang ang giingong langkubon sa ekspansyon sa *firing range* apan sulod sa usa ka semana, mikabat sa 20 ektarya ang gihawan sa mga sundalo. Giatubang sa mga residente ang gatusan ka sundalo nga gipadala sa Installation Management Battalion niadtong Abril 12. Nabalaka silang mapalayas bisan sa ilang mga puluy-anan.

Kanhi na nga ginareklamo sa mga residente ang grabe ka duol sa ilang mga umahan nga *firing range*.



Sa niagi, usa ka kanding ug usa ka kabaw ang namatay tungod sa saag nga bala gikan niini.

Panawagan sa mga mag-uuma sa lokal nga guberno sa Capas: ihunong ang pagpangawat sa yuta, pagpangguba sa mga pananom, hatagan og kumpensasyon ang giguba nga mga pananom ug kabtangan ug imbestigahan ang mga paglapas sa mga sundalo sa katungod sa mga residente.

Sa Negros Oriental, gatusan ka residente sa Barangay San Francisco, Sta. Catalina, kauban ang mayor sa lungsod, mga katutubo sa Bukidnon, ug progresibong organisasyon, ang nagprotesta niadtong Abril 12

batok sa kumpanya sa mina sa Sitio Tarug sa maong barangay.

Duso nila nga ihunong sa Midan Corporation ang mining exploration alang sa mga depositong bulawan nga nagalangkob sa 1,000 ektaryang yuta sa nahisgutang sityo. Matud nila, walay pagtugot ang mayor sa mga operasyon niini, ug sa aktwal, babag ang mayor dinhi nga si Mayor Peve Obaniana-Ligan.

Gimakmak usab sa mga grupong katutubo ang wala pagkuha sa ilang pagtugot sa proyekto. Duso sa Santa Catalina Bukidnon Tribe Association, kabahin ang kalamangan nga pagalangkubon sa mina sa ilang yutang kabilin. Dinhi nabuhi ang ilang tribu gikan sa unang giilang lider nga nagngalang Tolong. Subay sa balaod, kinahanglang ihatag usa sa mga katutubo ang ilang Free, Prior, and Informed Consent.

Nagsumite usab og resolusyon ang mga konseho sa mga barangay nga apektado sa mina batok sa mga operasyon niini. AB

EDCA ug "modernisasyon" sa AFP

Gipanghinambog sa US ug sa rehimeng Marcos II nga kabahin sa programang "modernisasyon" sa AFP ang pagtukod sa US og mga base militar sa lain-laing bahin sa nasud.

Sa bag-uhay lang nahuman nga 2+2 Ministerial Dialogue tali sa mga opisyal sa depensa ug relasyong panggawas sa US ug Pilipinas niadtong Abril 11, gipasigarbo sa US ang hangtud P10 bilyong pondo nga ibubo niini sa Pilipinas kadungan sa pagbwelo sa pagtukod niini og dili moubos sa siyam nga base militar.

Ang \$100 milyon (P5 bilyon) iga-hin aron "papaspason" ang pag-ayo sa maong mga lokasyon subay sa mga rekisito ug panginahanglan sa US. Ang dugang P5 bilyon anaa sa porma sa ginamang-US nga multirole fighter ug helikopter nga Chinook.

Sa maong tigom, walay pagduhahang gipatigbabawan sa US ang

programang modernisasyon sa AFP sa gianunsyo niining Security Sector Assistance Roadmap. Gamiton ang maong "roadmap" aron itakda kung unsang mga armas ug himan-militar ang igatambak sa US sa Pilipinas sa mosunod nga lima hangtud 10 ka tuig.

Nakauyon ang roadmap sa paglatag sa US sa opensibang maniobra nga giilang "First Island Chain" aron liyokan ang China ug pugngan ang paglapad sa impluwensya niini sa rehiyon. Kabahin sa maong plano ang pagtukod og mga pasilidad aron punduhan sa mga *rocket*, misayl ug sistemang artileri nga gamiton ugaling "atakehon" sa China ang Taiwan.

Ang maong opensibang lakang pagsanga-sa-dila sa US nga kunuhay nagaduso sa prinsipyo sa One China kung asa nakapailalom ang Taiwan sa China samtang sa likod aktibong ginahagit ang "independensya" sa ulahi. Sa ingon, ginaguyod sa US ang Pilipinas sa hisgutanan sa soberanya tali sa Taiwan ug China, sukwahi sa palisiya sa Pilipinas ug mga nasud sa Southeast Asia sa *non-interference* (dili pagpanghilabot).

Samtang, hugot nga gibabagan sa mga residente ug lokal nga mga opisyal sa Cagayan ang pag-abli sa duha ka "lokasyong EDCA" sa probinsya. Niadtong Abril 17, mikabat sa 5,000 residente ang nisalmot sa usa ka "prayer rally for peace" sa Rizal Park sa Tuguegarao City nga gipasigudahan sa Prayer for Peace Cagayan Movement. AB

War games sa US, perwisyo ug hulga sa mga Pilipino

Naglunsad og koordinadong mga protesta sa sulod ug gawas sa nasud ang mga nasudnon-demokratikong organisasyon sa unang mga adlaw sa ika-38 nga US-PH Balikatan Exercises niadtong Abril 11. Gibatikos nila ang paggamit sa US sa Pilipinas aron manghagit og gyera batok sa karibal niining imperyalistang China.

Sa Metro Manila, nagpiket atubangan sa Camp Aguinaldo, Quezon City sa pagpasiugda sa Bagong Alyansang Makabayan niadtong Abril 11. Aduna usay susamang protesta sa New York sa maong adlaw.

Kadlawon usab naglunsad og pinakilab nga rali ang mga membro sa League of Filipino Students atubangan sa embahada sa US sa lungsod sa Manila. Duha ka raliyista ang giaresto ug gipasakaan og kasong pagpangsamok. Giaresto usab sa mga pulis ang upat nga paralegal nga nagluwas sa ila apan gipagawas ra dayon. Isip suporta sa mga giaresto, naglunsad og paglihok ang lain-laing grupong kabatan-onan atubangan sa Philippine General Hospital ug Far Eastern University. Aduna usay paglihok ang kabatan-onan sa University of the Philippines-Visayas.

Walay kamatuuran ang ginai-ngon sa rehimeng Marcos, AFP ug sa US nga ang maong mga war game alang sa kaayuhan ug makatabang sa mga Pilipino, matud sa mga nagaprotesta. Sama sa niagi, pagpangandam sa gyera ug pagpakita sa imperyalistang kusog sa US ang tumong sa Balikatan. Pagyatak kini sa soberanya sa nasud ug pagbutang sa peligro sa kinabuhi ug panginabuhian sa mga Pilipino.

Sa Nueva Ecija, gikundena sa mga residente sa sunud-sunod nga pagpabuto og mga kanyon ug pagpamomba sa mga tropang Amerikano ug Pilipino sa Fort Magsaysay. Kadaghanan sa mga pagpabuto madungog sa gabii, sa may alas-11, nga makakurat ug makaperwisyo sa katawhan, ilabina sa natulog nga mga bata. Kabahin sa pagbansay ang mga *live-fire*

exercise kung asa nagagamit og tinuod nga bala ug bomba ang mga sundalo. Gawas sa ginahatag niini nga troma sa mga sibilyan, nagaresulta usab kini og dislokasyon sa ihalas nga hayop sa sikbit nga kalasangan ug nagbilin og makahilo nga materyal nga makadaot sa kinaiyahan.

Gitaho sa Gabriela nga daghang mag-uuma sa lugar ang nagalikay mogawas sa ilang mga komunidad sa kahadlok nga ma-igo sa mga pagbansay. Apektado ang ilang panginabuhian tungod niini. Kini usab ang gidangatan sa gagmay nga tigpangisda nga gibawalang mangisda sa dili moubos sa lima ka lungsod sa Zambales aron hataga'g dalan ang Balikatan. Anaa sa pungkay sa panahon sa tigpangisda ang pagbawal. Gikundena sa Pamalakaya ang pamahayag sa tigpamaba sa Balikatan nga usa ka "gamay nga kahaso!" ang pagbawal bugti sa "nasudnong seguridad." Duso sa Pamalakaya, nga kinahanglang ang mga tropa sa US ang mohawa sa lugar aron mahimong malinawon ang mga mangingisdang Pilipino.

Molanat og 18 ka adlaw ang Balikatan. Tumatambong dinhi ang 12,000 tropang Amerikano, 5,400 tropang Pilipino ug 111 tropang Australano. Gawas sa *live-fire exercise* sa Fort Magsaysay, magpatundag usab ang mga tumatambong og usa ka barko sa kadagatan sa Zambales nga 185 kilometro gikan sa Panatag Shoal, ang tradisyunal nga isdaanan nga abli pareho sa mga mangingisdang Chinese ug Pilipino. Mogamit ang US og mga armas sama sa HIMARS (High-Mobility Artillery Rocket System) ug mga rocket ug bombang buhian sa mga eroplanong panggyera sa US ug Pilipinas aron himuon kini. "Bansayon" usab sa US ang mga sundalong Pilipino sa paggamit og Patriot missile, Javelin anti-tank weapon ug uban pang armas nga ginagamit karon sa gyerang proxy sa US batok sa Russia sa Ukraine.

Ang Balikatan unang gipahigayon niadtong 2002 sa tabil sa "gyera kontra-terorismo." AB

Pinakilab nga rali alang sa NDFP. Nagpahigayon og pinakilab nga rali ang gatusan ka myembro sa lain-laing grupo ubos sa National Democratic Front of the Philippines niadtong Abril 19 isip kabahin sa pagsaulog sa ika-50 ka tuig nga anibersaryo sa alyansa. Gipahigayon ang pinaspasay nga programa sa Cubao, Quezon City. Gibasa dinhi ang pahayag sa Partido nga nagapanawagan sa usa ka semanang pagparangal sa tanang mga martir sa rebolusyong Pilipino sa nangaging kapin lima ka dekada.

Ihunong ang SimReg Law. Giduyogan og protesta sa mga mamamahayag ug aktibista ang pagpasaka og petisyon aron ipahunong ang implementasyon sa Sim Card Registration Law niadtong Abril 17. Subay sa gisumiteng petisyon, gilapas sa balaod ang katungod sa pribasiya sa mga Pilipino ug gitangtang niini ang rekisito sa search warrant tungod kay ginaobliga niini ang paghatag og personal nga impormasyon sa matag nagagamit og SIM. Sa kasamtangan, halos 60% pa sa mga nagagamit og selpon ang wala nakarehistro ug nahulgang mahikawan og katungod sa komunikasyon.

Protesta sa PUP. Nagprotesta ang mga estudyante sa Polytechnic University of the Philippines-Manila niadtong Abril 17 aron obligahon ang administrasyon sa unibersidad nga resolbahon ang kawalay-kurentente sa Mabini campus niini. Gigamit sa administrasyon ang kawalay-kuryente aron isuspinde ang limitadong face-to-face nga mga klase.



2.3%

lang ang abereyds nga gipalit sa **National Food Authority (NFA)** nga lokal nga hu may sukad 2018 hangtud 2022.

Ubos na gani kaayo, wala pa nakab-ot sa NFA ang target niining paliton.

87%

sa mga magtutudlo ang nagsulting dili maka-punting sa klase ang mga bata tungod sa sobrang init sa panahon sa ting-init.



Duso nila, ibalik sa kanhing iskedyul ang *school year* kung asa adunay *summer break* gikan Abril hangtud Mayo.

Tinubdan: ACT Teachers Party

270 TUIG

ang kinahanglan ayha moabot og **\$1 milyon o P55 milyon** ang kita sa usa ka mamumuong Pilipino.



Samtang, **14 ka tuig ug 2 ka bulan** lang ang kinahanglan sa usa ka mamumuong Swiss aron kitaon ang maong bili.

54%

sa mga nagaprotelang nars sa UK ang nagdumili sa dalit sa ilang estado nga 5% nga pagtaas ng ilang sahod.



Duso nila ang pagtaas sa sweldo subay sa pagsutoy sa tantos sa implasyon nga mikabat na sa 10% niadtong Marso.

6%

lang sa pamilyang Pilipino ang langkob sa pakitang-tawo nga **Kadiwa store** ni Marcos Jr kung asa gipasigarbo nga anaa sa P25 ang pagbaligya og bugas matag kilo.



110

ka tawo, lakip ang mga bata, ang napatay sa **rehiyong Sagaing sa Myanmar** sadihang gipaulanan og bomba ug bala sa hunta militar ang lungsod sa Kanbalu niadtong Abril 11.

Tinubdan: The Irrawaddy

BATANG ABRIL



Jorge Madlos
(Ka Oris)

nipanaw nga nasudhong tigpamaba sa BHB. Gipanganak niadtong **Abril 22, 1947.**



Gregorio Rosal
(Ka Roger)

nipanaw nga nasudhong tigpamaba sa PKP. Gipanganak niadtong **Abril 19, 1947.**

Krisis sa trabaho: Nagkadakong ihap sa trabahong impormal

Sukwahi sa gipagawas sa rehimeng Marcos Jr ug mga ekonomista niini, wala niabante ang ekonomiya sa Pilipinas human ang subli niining pag-abli niadtong niaging tuig. Kadungan sa pag-ubos sa tantos sa empleyo ang pag-hagba sa ihap sa mga mamumuong dunay pultaym nga trabaho. Sa ingon, nagkadaghan ang natukmod sa ginatawag nga impormal nga sektor sa pamuo.

Gilangkuban kini sa mga *self-employed* (nag-empleyo sa kaugalingon), mga nagtrabaho sa gagmay nga umahan o negosyo, mga katabang, ug walay bayad nga mga trabaho sa pamilya. Ang mga mamumuo niini nga sektor nagadawat sa wala o ubos kaayong suhol, walay kasigurohan ug walay mga benepisyo. Dili sila langkob sa mga balaod nga nagadumala sa kusog-pamuo ug gihi-kaw sa ila ang katungod sa asosasyon ug pag-union.

Wala silay tingog sa mga empresa o subsektor nga ilang gitrabahuan. Wala silay mga proteksyon sa mga lugar sa trabaho ug sa ingon vulnerable sa dili luwas ug dili makatawong kundisyon sa pamuo, pagpang-abuso ug sobra-sobra nga pagpahimulos ug pangdaug-daog. Dili katingad-an nga daghang bata ug giulipong mamumuo ang makita niini nga sektor. Sa depenasyon sa International Labor Organization, layo kini nga trabaho sa ginaila nga pormal o disienteng trabaho.

Niadtong Enero, gitansya nga naa sa 20 milyon o 42.2% sa kinatibuk-ang ihap sa mga mamumuong Pilipino ang naa dinhi nga sektor. Grabe nga mas dako kini kumpara sa ihap niadtong Enero 2020 nga 16.8 milyon. Kung tapuon niini nga ihap ang mga mamumuong iregular sa mga pribadong establisimyento, posible nga mokabat pa sa 34.5 milyon o 73% sa kinatibuk-ang empleyo sa nasud ang impormal. Buot ipasabot, walay disienteng trabaho ang pito sa matag 10 ka mamumuong Pilipino.

Nagasulod kini nga mga mamumuo sa impormal nga ekonomiya dili tungod sa kagustuhan nila kundili tungod kay wala silay mapilian kung gusto nila nga makasuhol o mokita. Pipila sa ilaha ang nagakita og mas dako kumpara sa mga regular nga mamumuo, sama sa mga propesyunal ug nakahaman sa kolehiyo. Pero ang dakong mayorya lubong sa kalisud, nagpuyo sa piot nga komunidad, walay akses sa disienteng serbisyong katilingbanon, walay akses sa dugang nga kapital ug kasagaran

target sa pagpangabuso sa mga awtoridad.

Dakong bahin sa mga trabahong impormal hingpit nga nakadepende sa kliyente, suki o pamilya nga nag-empleyo. Niadtong Enero, niga-may og 746,000 ang ihap sa mga *self-employed*. Nakulangan usab og 433,000 ang ihap sa *unpaid family worker* o wa-

lay bayad nga mga trabaho sa pamilya. Sa kaso sa ulahi, kasagaran nga hingpit nakasandig ang mamumuo sa pamilya nga gitrabahuan niya para sa iyang pagkaon ug pinuy-anan.

Gakahitabo ang pagdako sa impormal nga sektor dungan sa paghinay sa kapasidad sa ekonomiya nga magmugna og disente o regular nga trabaho. Niadtong Enero, mokabat sa 1.7 milyon ang nawala nga trabaho resulta nag-ugna sa pagtangtang sa mga empresa ug negosyo sa mga mamumuo human ang panahon sa Pasko. Kadungan niini, nitaas ang ihap sa mga walay trabaho og 153,000 ug ang mga kulang sa trabaho og 458,000.

Gawas niini, niubos usab ang ihap sa nahilakip sa pwersa sa pamuo gikan 51.2 milyon ngadto sa 49.7 milyon (1.5 milyong paggamay). Patin-aw sa Ibon Foundation, ginasalamin sa pag-ubos sa ihap ang nagkadakong tantos sa mga mamumuong nawad-an na og paglaom nga makakita og trabaho apan wala gikategorisa nga walay trabaho.

Pinakadakong ihap sa nawalang trabaho anaa sa sektor sa agrikultura (1.2 milyon), nga gilangkuban sa pana-panahon nga trabaho. Nikunhod usab sa 375,000 ang trabaho sa bentaha nga binulto ug minudo ngadto 10.6 milyon; sa konstruksyon, nakibhangan og 288,000 ang empleyo ngadto sa upat ka milyon.

Dugang dinhi, nagapatong sa ihap sa mga walay trabaho ang mga gradweyt sa K-12 nga wala gidawat tungod sa kakulangan sa mga rekisito nga ginapangita sa mga kumpanya.

Matud sa Commission on Human Rights (CHR), nitumaw sa ilang pagtuon nga pipila sa hinungdan map ang kakulangan sa mga bagong gradweyt sa "soft skills" o abilidad sa pakiglambigit sa ubang ta-wo, komunikasyon ug emosyon. **AB**

